

Sr. Frank Tieleman di fundacion Adopt An Addict

Accesibilidad di droga ta facil y speransa pa rehabilita un adicto ta dificil

ORANJESTAD - Fundacion Adopt An Addict cu ayudo di comunidad ta haciendo un esfuerzo inmenso pa manda e adictonan bay rehabilita na Santo Domingo.

Esaki ta un proceso largo di mas cu dos aña caminda e adicto ta ricibi ayudo profesional di entre otro terapistanan pa nan por sali for di nan problema di

adiccion. Sinembargo e persona aki ta keda fragil y algun di nan ta cay bek den e consumo di droga. E ta un proceso duro ya cu ademas di e inversion cu a ser hinca pa rehabilita un hende, tur speransa pa scapa e hendenan aki for di e garanan di droga por bay perdi facilmente. Nan ta sucumbi pa e tentacion cu ta existi riba caya caminda nan tin facilidad pa haya e

droga. E accesibilidad di e parti di e droga a keda mesun cos e no a cambia, segun sr. Frank Tieleman di fundacion Adopt An Addict.

"E tentacion ta keda pafo mescos, e tentacion no a cambia ta e persona tin cu cambia, y e proceso pa e persona cambia ta esun mas dificil", segun sr. Frank Tieleman di fundacion

Adopt An Addict.

Pesey ta importante pa e adicto por a bin full cambia pa e no cay den e tentacion di bay caminda e sa cu e ta haya droga. Y e actitud aki ta mas dificil tin biaha cu e rehabilitacion mes. "Paso bo por rehabilita e persona pa e no uza droga, pero si bo ta pone sinta, y dilanti e cas cu e ta biba nan ta bende droga tur dia, e

mester ta e control pa bisa mi no mester di dje mas..." asina el a declara na BON DIA Aruba.

E ta bisa cu apesar di e proceso di rehabilitacion, e persona ta keda cu su inclinacionnan pa bay den e direccion ey. Pesey cu e fundacion aki tin un cas bou e concepto di un "half-way house", ora cu e adicto rehabilita ta bin for di "Hogares Crea" na Sto. Domingo, e "half-way house" aki su obhetivo ta pa mantene e hendenan aki riba e caminda drechi. Ya cu e persona aki -segun sr. Tieleman- por cay den cierto debilidad pero nan tin cu trece bek pa e adicto rehabilita ta keda corda kico el a bay haci, y kico ta corecto y kico no. □